



PORTAVÓS VI GOVERNUN KONSTITUSIONÁL



KOMUNIKADU BA MEDIA

Dili, loron 15 fulan-abríl tinan 2016

Governu no Prezidénsia Repúblika hetan ona akordu kona-ba xefia F-FDTL nian

Ida husi proposta rua Governu nian ba nomeasaun xefia foun ba FALINTIL-Forsa Defeza Timor-Leste (F-FDTL) hetan ona aseitasaun husi Prezidente Repúblika.

Iha loron 7 fulan-abríl, durante sorumutuk semanál ho Primeiru-Ministru, Rui Maria de Araújo, Prezidente Repúblika, Taur Matan Ruak, husu ona ba Governu apresenta proposta foun ida ba xefia F-FDTL nian. Proposta ida ne'e iha tiha ona konsulta ida ho atuál xefia sira husi F-FDTL, husi Ministru Defeza, no rezultadu husi análize kona-ba situasaun ne'ebé hala'o tiha iha sorumutuk Konsellu Ministru nian, iha loron 12 fulan-abríl.

Iha loron 13 fulan-abríl, Governu haruka proposta rua ba Xefe Estadu. Horisehik, Prezidente Repúblika fó sai katak nia hatán ona proposta ida husi proposta rua ne'e.

Portavós Ezekutivu, Ministru Estadu Agio Pereira, hatete "Governu haksolok tanba órgaun soberanu rua ne'e bele to'o ona iha hanoin ida ne'ebé hanesan kona-ba xefia iha Forsa Defeza iha país ne'e. Dala ida tan, mak ita konsidera katak, tau ona iha prátika diálogu no respeitu mútuu ne'ebé hatudu ita-nia sistema demokrátiku, nu'udar prova ba pás, estabilidade no progresu ne'ebé mak sura labele iha ita-nia nasaun joven ne'e". **REMATA**

